

TXITO

Paoro Iokanatsopatakiti Txitomoni

¹ Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatano kâkitimoni Teoso mereêkini auiâkiti sâkiretxiti nisâpiretini îkapani. Iokanatano kâkitimoni atão inakari imarotinina îkapani. Atão inakari imarotiko oerekaua Teoso nireêkiti akamini îkapani. ² Aãuikari aãuapininiika anini Teosokata, kotxi kitxakapirîka itixi kamiko apisa Teoso kamaenetari ikara. Ininiâ apokapitikako, kotxi atãonoka iua sâkire. !Iposotari atão minakati isâpiretini. ³ Iketotiniri manapi oerekari isâkire. Isâkire sâpiretakani sâpiretari isâkire. Ininiâ Teoso sâkire notamoni isikakiti nisâpiretai, kotxi Teoso amaerekani makatxakakari paniâtano nota nisâpiretiniri isâkire.

⁴ Niokanatsopata pite Txitomoni. Namarite atão inakari atoko pitxaua, kotxi pite auikari Xesosi sâkire nota auikiniri atoktxikana. Aîri Teoso, aãuîte Xesosi Kristo amaerekani makatxakakari pakini, sikari ikinipoko erekari pitemoni. Ninoa iamoniîkai. Ikamaerekaxiniretaina.

Kõtâkikarerini

⁵ Nitakanapai pite Kreta pokomiriîti, kotxi aparîka iuaãtaã kona xipokapanika, ininiâ ninirekari pite kaminiri ikara parîkatxi. Pimereêna kõtâkikarerini ikini sitatxitîa Teoso sâkire auiâkani ôtâkikakani tîkane. Pimereêna mitxi nisâpiretakiti iaõka. ⁶ Ia atoko inakari kâkiti pimereê kõtâkikarerini îkapani: Iua kamari erekari, ininiâ maerekati auakasaaki, kona iua xikani maerekati apoka. ãtonokara îtanoro aua. Imiakori auikari Xesosi sâkire. Ninoa !neenamauata. Ikamarina iri paniâtakiti iaõka.

⁷ Teoso sikari iparīka kōtākikarerimoni ikamini īkapani, ininiā kōtākikareri kamari erekarinoka. Maerekati auakasaaki, kona iua xikani maerekati apoka. !Iuikaua. !Katimari omanākarauatini. !Ipoāta. Kona kaneenamari. !Itiretaro txineiro. ⁸ Kōtākikareri atāo inakari potxitari apakapiniri kākiti iua aapoko āki. Ipotxitari kākiti erekari kamakani. !Katima omanākarauatini. Erekarinoka ikama. !Ikamari maerekati. Erekarī imarotakiti !itapanari ikamini. ⁹ Kōtākikareri atāo inakari oerekaākapeka Teoso sākire. Imarotari Teoso kaminiri isākire iaōka, ininiā iteene inīkatari Teoso sākire. !Imamakari Teoso sākire. Ininiākara imarotari ōtākikiniri apanakini. Iteene imarotari Teoso sākire, ininiā imarotari oerekiniri apanakini Teoso sākire manirekakani, Teoso sākire auikinina īkapani.

Erepaniko, Atāo Minakati Oerekakani

¹⁰ Kaiāopokori kākiti kona nirekari Teoso nireēkiti ikaminina. Maxikatiīka isākirauatapika. Kamisirienererini ninoa. Ikara atoko inakani nirekari Teoso takaōtxikare Xoteo minakaniua itōā auini. ¹¹ Matxīkitakari ninoa iotokakiniri atāo minakati isāpiretinina, kotxi kākiti aapoko āki auakani naiatakakaua ninoa oerekakiti sākiretxiti xika. !Apakata ninoa oerekakiti sākiretxiti. Iuaritika ninoa oerekari atāo minakati, txineiro apakapinina īkapani. ¹² Ninoa atokirini kitxakapirīka, koerekareri, uai Kreta pokomiriīti auakarini, txari: “Kreta auakani ātipirika misirienetari kākiti. Maerekati kamakani itxauana. Kaneenamari itopa auakari atoko ikamana. Iarinouatana. Paixonina,” itxa iua.

¹³ Isāpiretakiti atāopitikara. Ininiā pitaparaxiniriritika pipinitana ninoa imasāpiretakanirina ikara atāo minakati, Xesosi sākire atāo auikinina īkapani.

¹⁴ Ininiā pisāpiretana: “! Himaākatapiriko Xoteoakori

kiomaneakorini sãkire atão minakati. !Himaãkatapena atão inakari manirekaãkani paniãtakiti.” ¹⁵ Kãkiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kãkiti imaerekani auapanika inakari, Teoso sãkire iaõka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani txikotari iua ãkixinire, ininiã ãkixinire !õtãkikari iua maerekati imakamakani ìkapani. ¹⁶ Ninoa txa: “Ate imarotari Teoso,” txamari ikamarina Teoso manirekakiniti, ininiã !imarotarina Teoso. !Inirekarina Teoso. Arakakani atoko itxana, maerekati ikamakitina xika. !Ikamarina Teoso nireëkiti, ininiã liposotarina erekari ikaminina.

2

Txito Õtãkikiko

¹ Ininiã poerekariko ikinika atão inakari Teoso oerekiko sãkiretxiti.

Kiki Aneëkani Õtãkikiko

² Ia atoko põtãkikana kiki aneëkani: “Hĩxinikariko hĩkamakiti tĩkane hĩkaminiri apisapanika. Erekari hĩkamako apanakini paxitinii ìkapani. Kona hĩkamapiri hiĩto nireëkiti. Iteene himarotariko hãuiãkiti. Iteene hĩtiraõkiuatako. Katima omanãkarauataka !hĩtxape.” Ikara atoko põtãkikana kiki aneëkani.

Sito Aneëkani Õtãkikiko

³ Ia atoko põtãkikana sito aneëkani: “Hĩkamariko Teoso pĩkakani kamakiti atoko. Maxikatĩika !hãpoĩtapiri ãti. Kona iteene hiãtapiri iãriã kapoãro. Erekarinoka hõerekako.” Ikara atoko põtãkikana ninoa. ⁴ Apaka põtãkikana sito aneëkani õtãkikinina ãtokoroakoro ia atoko: “Hĩtiretanako hĩtaniri, hamariteakori pakini.

⁵ Kona hīkīpitapiri hīto paniātakiti. Erekarinanira hīkamako. Hīkamariko hīparīka haāpoko āki. Erekarī hīkamako apanakini īkapani. Hītaniri nireēkiti hīkamako, ininiā iusaaki Teoso sākire mauiākani !imisākirepiretari Teoso sākire.” Ikara atoko sito aneēkani oerekanako ātokoroakoro.

Ātokoriakori Ōtākikiko

⁶ Ininiā iua atokokana pōtākikana ātokoriakori ia atoko: “!Apakata hīkaminiri hīto nireēkiti.”

Txito Ōtākikiko

⁷ Txito, ikini pikamakiti pikamako kākiti erekari kamiko imarotini īkapani. Poerekarauatakasaaki, poerekari kākiti pitiretiniri atāo inakari sākiretxitinoka. Poerekanako Teoso sākirenoka apiari inini. Poerekarauatakasaaki, poerekariko kākiti pimakoketakaniri atāo minakati pisākirekata. ⁸ Poerekariko atāo inakarinoka, ininiā !auari papoītiko, kotxi !pikerokari pisākire. Ikara atoko ininiā, pimokaiakarini pētauata, kotxi !iposotarina imisākirepiretinii.

Nitiritxi Amotakoni Ōtākikiko

⁹ Ia atoko poerekanako nitiritxi amotakoni: “Hīkīpitariko hīpatrāote sākire. Hīkamariko hīpatrāote apokaerekatakitinoka. Kapakapaenere !hītxape. ¹⁰ ! Hīitirīkapiri hīpatrāote tii. Hōerekariko hīpatrāote pisākire atāo inini. Ininiā hīpatrāote nirekari imarotininirina Teoso oerekiko, amaerekani makatxakakari oerekiko.”

Ikinipoko Erekarī Teoso Sikakiti

¹¹ Ikinimanemoni Teoso oerekapekari erekari isikakiti kākiti maerekani imaktxakini. ¹² Teoso sikakiti erekari oerekaua atakanapiniri Teoso manirekakiniti. Teoso sikakiti erekari oerekaua amanirekakaniri īkorapokoriti auakani īto nireēkiti. Teoso sikakiti erekari

oerekaua aïto paniãtakiti atakanapini, atão inakari-noka akamini, Teoso nireëkiti akamini ïkorapokoriti aãuakasaaki. ¹³ ïkorapokoriti aãuakasaaki, aiãtapari poxononitxi õti Apiananiri aTeosone apokini õti. Iuasaaki Xesosi Kristo, amaerekani makatxakakari, motika atemoni. ¹⁴ Iuaka sikaua Teosomoni ate ïkapani ipïkasaaki. Iuasaaki iïkitxitari Teoso, ininiã Teoso makatxakaua ikinika maerekanitxi sauaki. Ikara atoko ininiã, ikamaerekaataua ate. Ininiã itxïkitakaua inakitiakori aniniua, ininiã anirekari erekari akamini.

¹⁵ Auïtetxi pininiua atoko pipaniãtariko kãkiti kïpitiniri ikara nisãpiretakiti. Põtãkikana nisãkire makïpitakani. Kona pauiritapiri kãkiti sãpiretiniri pisãkire atão minakati inini.

3

Teoso Nireëkiti Kamiko

¹ Txito, ia atoko poerekariko kãkiti: “Hïpaxitariko ïkorapokoriti auïtetxiakori paniãtakiti, poiãori auïtetxiakori paniãtakiti apaka. Iposope hïtxako ikinika erekari hïkamini. ² Kona himisãkirepiretapiri apanakini. ! Hineenamauatape. Merepanika hïxinikariko apanakini, eereka hïteka hïxinika. Hõerekariko kãkiti, hïxinireë hinirekiniri erekari hïkamini ikinimanemoni.” Ikara atoko poerekana.

³ Teoso aimarotini apisapanika miïkiteni atxaua. Kona akïpitari kãkiti sãkire, Teoso sãkire apaka. Iuasaaki ate misirienetaãka. Iuasaaki akamari aïto nireëkitinoka. Ikini sereti maerekati akama apoxokoniuatini ïkapani. Iuasaaki ikiniõtika axinikari maerekati akamini. ! Apakata akamakiti. Kaxikorerini atxaua iuasaaki. Ate omanataãka. Apaka ate omanatari apanakini iuasaaki.

⁴ Ininiã eereka Teoso tiraõki, amaerekani makatxakakari tiraõki, iua amonïkare, apoka atemoni.

⁵ Ateka parïka erekari !imakatxakari amaerekani. Iua

amonĩkarenokara makatxakari amaerekani. Iuasaaki na atão akama, iuaritika imakatxakari amaerekani, kotxi itiretaua. Iuasaaki iua arokari aãkixinire. Itxĩkitakaua ate aponaniini iuaĩkana. Iuasaaki Erekarı Matamatakoti kamari ikinika amaneri axinireẽ. ⁶ Teoso iokanatarı Erekarı Matamatakoti kaposotiireri atemoni, kotxi Xesosi Kristo, amaerekani makatxakakari, ipina ate ĩkapani. ⁷ Iua sikari ikinipoko erekarı atemoni, ininiã ikamaerekataua. Ininiã itxĩkitakaua Teoso anaakori aniniua, ininiã aãpakapariko ipotetakiti ate ĩkapani. Iua atoko ininiã, aiãtapari ãtipirika Teosokata aũuini ĩkapani. ⁸ Atãopitikara ia nisãpiretakiti.

Ininiã ninirekarı ãtipirika pisãpiretiniri ikinika nisãpiretakiti Teoso sãkire auiãkanimoni. Ikara atoko Teoso auiãkani itaparaxinireritika kamariko erekarı apanakini ĩkapani. Kona maxikatĩika ikamarina erekarı. Teoso atão ĩkitxitariko kãkiti. Ikara atoko kãkiti kaminiã, ininiã erekarı ikinimane ĩkapani.

⁹ Kona pimaãkatapiri miĩkiteti sãkire. !Hĩtaparakien-atakakapeua kitxakapirĩkarini uãka xika. Kona himaãkat-apanako kãkiti kiomãtxiakori oerekakiti xika tsoatakani. Ikara sãkiretxiti !itxĩkitakai erekarı hininiua. !Itxa ikara sãkiretxiti.

¹⁰ Kãkiti oerekiniãri atão minakati Teoso manirekakiniti, põtãkikari iua ipikata. Iposo atoko !pimaãkataikari. ¹¹ Ikara atoko inakari atão iĩkite ! auari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sãpiretakiti Mapotõkire

¹² Niokanatarı Atemasi inakori, atxiĩti Txĩkiko inakori apaka pitemoni. Ninoa apokasaaki, paiamata pisini ĩkapani, katimari notamoni Nikõpori sitatxitiã hãpokini ĩkapani. Ninirekarı ia mitaãti nikaikotini iuaã.

¹³ Pimoianatari Sena inakori, Aporo inakori pakini. Auñtetxiakori paniãtakiti imarotakari iua Sena. Pimoianatanako ninoa aiamatini. Iamonitakitina pisikanako. ¹⁴ Aĩtariakori Xesosi sãkire auiãkani apaiaõkariko erekari ikaminina, kãkiti minakati mauakiniti imoianatinina ãkapani. Makamaretika hinini lapakata.

¹⁵ Notakata auakani xinikapikai pite. Pisãpiretanako ate tirketakani ereẽ Xesosi sãkire auiãkani nixinikamanapitana ninoa.

Ikinika erekari Teoso sikai hĩte hĩkinika. Ikara atoko niõkatsopata pitemoni. Ameẽ.

Teoso sãkire ameneri New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21
